

籌辦夷務始末

籌辦夷務始末卷之三十四

道光二十一年辛丑八月己酉杭州將軍奇明保浙江巡撫劉韻珂杭州副都統恆興奏竊臣劉韻珂前因逆夷來浙夷船日益增添共有四十餘隻其意總欲在浙一逞居心險毒當經分飭定海鎮等營縣從嚴堵禦其省城距鎮海較遠

欽差大臣裕謙難以兼顧臣等遵

旨親督兵勇在省嚴防乍浦則令在彼駐守之杭嘉湖道宋國鐸與乍浦副都統臣長喜嚴密防範業經由驛附片具奏在案嗣於八月十九日接據署定海縣知縣舒恭受稟報該

逆火輪船兵船四隻。於十二日攻犯定海。當經定海鎮總兵葛雲飛等督兵擊退等情。該署縣此稟。係於十三日自定發申。以後數日。該署縣及在定文武。絕無文稟到省。而鎮海各洋面停泊夷船。據鎮海縣營稟報。十五六等日。多向定海駛去。臣等揣測夷情。顯在定海滋擾。因省城距彼甚遠。文報既不能通。無由查探實情。日夜焦慮。茲於二十一日子刻。疊接甯紹台道鹿澤長甯波府知府鄧廷彩等自鎮海來稟。據稱逆夷於十三日至十七日。疊次用船攻犯定海。我兵奮勇迎擊。連獲勝仗。殺死逆夷不計其數。並經葛雲飛擊燬其火輪船一隻。該逆不能得手。十四日該

逆分兵由陸路攻撲晚峯嶺。經壽春鎮總兵王錫朋統率該鎮兵八百名。在彼堵禦。壽春鎮兵最為精銳。與該逆相持四日。殺逆無算。各兵亦日有傷斃。至十七日。該逆仍分番壘進。寡不敵眾。壽春鎮兵所存無幾。王錫朋傷重。徇節晚峯嶺。為逆夷所奪。該逆即由嶺轉攻竹山門。用大礮轟擊。處州鎮總兵鄭國鴻。被轟陣亡。肢體糜爛。逆夷復自竹山門轉犯東嶽宮。葛雲飛勢孤不支。當即徇節。維時舒恭受嬰城固守。身受重傷。見勢不可為。將糧臺用贖餘銀九千兩。交委員候補同知黃維誥。及該縣典史鄧鈞等。運送內渡。又將印信。交其堂弟舒恭烈齎送至鎮。即行捐軀。徇

節城隨失陷。此外守備以上各官亦多陣亡等情。臣等接聞之下。髮皆上指。伏查此次該逆連日用船礮。在海洋攻打定海。均未取勝。及其分兵由曉峰嶺而上。以身經百戰。忠勇素著之總兵王錫朋。統率壽春精兵奮勇堵勦。該逆竟能於崇山峻嶺之中。與我兵相持至四日之久。以致我兵寡不敵眾。紛紛陣亡。奪占該嶺。復由嶺轉犯竹山門。東嶽宮。因將縣城攻陷。其陸路兇悍情形。與在洋面橫行無異。向來所謂該逆登陸即無能為者。殊非篤論。現在該逆既已陷我定海。驕盈已極。難保不四處衝突。鎮海乍浦及省垣。在在喫重。除鎮海現有

欽差大臣裕謙暨提臣余步雲督帶鎮將。在彼駐守一切戰守事宜。應由該大臣等就近相機籌辦。至乍浦距定海僅隔一潮。實為浙西最要之地。省垣則以海甯州之尖山口為關隘。尖山口雖在乍浦之內。然距省最近。水面遼闊。該逆可以舍乍浦而徑犯尖山。該處港寬潮湧。水中萬難堵截。祇能在省中預備陸戰。即乍浦亦無可扼之險。均當豫為陸戰之計。臣等前因該逆在粵修整礮車。即於各處擇要設伏。以備截殺。第該逆現在勢甚兇猛。必須兵力厚集。且有精勇之師。陸戰方能取勝。乍浦雖歷經添有嘉湖兩協兵丁。然合之本營水師。及乍防滿兵。僅止二千餘名。為數

無多。省城則無調防之兵。省標滿綠各營額設之兵。連分  
汛存城各項。合併計算。不過四千餘名。地既寬廣。分段設  
防。勢亦單弱。此外雖經臣劉韻珂在乍浦省城海甯一帶。  
先後雇募鄉勇。並令紳士團練義民數千名。協助兵力。惟  
鄉勇義民。究與兵丁不同。誠恐事急之時。未能奮不顧身。  
同仇敵愾。自應添調兵丁。方可倚賴。臣等與司道等再四  
熟籌。因乍浦與定海較近。先於臣奇明保恆興挑備之旗  
兵一千名內。選派二百名。再於湖州協調兵二百名。共四  
百名。前往乍浦協防。又於太湖麗水楓嶺等營。調兵四百  
名。以一百名至逼近乍浦之海鹽縣防守。三百名在省防。

守藉壯軍威而固民心。惟是該逆兇悍異常。乍浦省垣現添之兵。為數仍屬有限。誠恐不能即資攻戰。而浙省各營此外再無可調之兵。惟有仰懇

天恩。俯念浙省情形緊急。在距浙較近之江西九江鎮。調兵一千名。湖北黃州協等處。調兵一千名。

敕下該督撫迅速派委明幹鎮將。管帶來浙。以便分防乍浦省垣。俾資攻勦。感沐

鴻慈。實無既極。再前奉

諭旨。調赴閩省之江西兵二千名。現經

欽差大臣裕謙。以廈門業已收復。截留赴浙。今臣等又調江西兵

一千名統計三千名。該省地居腹裏尚不致即廢操防。其湖北兵丁並未調動更易分撥似均無顧此失彼之虞。至壽春處州定海三鎮臣及署定海縣知縣舒恭受等分段戰守力竭死節勇烈昭著應由裕謙就近查明隨同陣亡各員弁兵丁一併奏請

賜卹以慰忠魂。臣劉韻珂職任封圻有守土之責今逆夷猖獗致縣城被陷應請

旨交部議處以懲疏防

諭內閣兩江總督裕謙經朕特簡欽差大臣駐紮浙江專辦防海事務乃與提督余步雲在鎮海軍營籌辦半年之久未能先機

布置致定海縣城失守。昨已降旨將裕謙交部嚴議。余步雲亦著交部嚴加議處。浙江巡撫劉韻珂專在省城籌防。未能兼顧。與烏爾恭額尚屬有間。著交部議處。

諭軍機大臣等。昨據裕謙奏定海失守情形。已明降諭旨將裕謙交部嚴議。本日又據劉韻珂奏請議處。並懇調鄰省勁兵一摺。已飭裕泰吳文鎔每省各調精兵一千名。迅赴浙江。交該撫調遣。並降旨將劉韻珂交部議處矣。浙江乍浦及尖山口最為要緊關隘。該逆乘此兇殘。難保不四出滋擾。該撫已分調本省兵勇就近防守。並著廣募水勇。團練鄉民。諭以爾等同心為國出力。即可自保身家。眾志成城。何敵不克。一俟湖北江西兵丁到

齊彼時相度機宜。如能一面防堵。一面協同。裕謙助其進剿。更為得力。是在劉韻珂善畫善總之。我兵首尾相應。不得顧此失彼。是為至要。

又

諭現在逆夷猖獗。浙江定海業已失守。據劉韻珂奏。乍浦海口及浙江省垣。亟須添兵防堵。著裕泰挑選湖北黃州協等處精兵一千名。吳文鎔挑選江西九江鎮精兵一千名。飭令曾經出師之明幹鎮將管帶。迅速前赴浙江。交劉韻珂調遣。毋許沿途滋擾。

又

諭逆夷現在浙洋滋擾定海地方業已失守據裕謙等馳奏此次犯順情形該夷匪等竟敢登岸與我兵接仗以致眾寡不敵城池失陷江蘇寶山等處最關緊要沿海各口岸固宜密為防堵其陸地要隘處所尤當相機設伏防其登陸肆擾著梁章鉅陳化成妥密熟籌相度地勢豫為布置務使水陸交嚴該逆無隙可乘不可稍存大意是為至要

庚戌江蘇巡撫梁章鉅奏竊臣於七月二十八日束裝起程前赴上海等處籌辦防堵事宜茲於八月初一日行抵上海查覈防堵各要口本營及外調官兵暨各該縣募置鄉勇碁布星羅防守尚為周密嗣於初四日承准軍機大

臣飛寄欽奉

上諭。倭夷占據廈門。難保不乘風北駛。擾及沿海各省。務須妥為  
布置。毋稍疏虞。陸路亦不可不加嚴備等因。欽此。遵查江蘇洋  
面。本年來並無夷船遊奕。惟夷情狡譎。斷不可因其未來。  
稍疏防範。旋准兩江督臣裕謙。以浙洋夷船日見增添。兵  
力不敷。調遣飛文咨商。令將派防上海寶山之徐州鎮標  
兵三百名。調赴鎮海軍營。當經會同提臣陳化成。給發傳  
牌。即日起程赴浙。一面就近抽撥補防。仍察看兵力。如稍  
單薄。另行會籌調撥。至上海礮局。續鑄有四千餘斤大銅  
礮十尊。已解至吳淞。臣親歷各口。妥為安設。即會同提臣

照一藥二子之法。逐加演放。均能致遠。有準。吳淞海口東  
西岸。兵勇槍礮。夾路林立。可期有備無患。至續鑄各礮。容  
俟鑄成。再行擇要分撥。其餘火藥礮彈。亦俱製造齊全。不  
致臨時掣肘。臣於布置後。仍回駐上海縣城。飭令該縣講  
求保甲團練之法。以固內圉。現在兵民輯睦。堪以仰慰。

宸廑。

諭軍機大臣等。據梁章鉅奏。查勘吳淞海口。並演試新鑄大礮情  
形等語。逆夷占據定海。距江蘇吳淞海口甚近。亟宜加意籌防。  
該撫既親歷查勘。會同提臣陳化成。逐一詳加準備。並將上海  
礮局。續鑄四千餘斤銅礮十尊。解至吳淞試演。均能致遠。萬一

逆夷竄至。自己已有備無患。該撫務當激勵將士奮勇爭先。處處布置周密。勿令逆夷稍有得手。如察看兵力尚單。即行會商調撥。以期聲勢聯絡。戰守有資。水陸交嚴。不可稍存大意。是為至要。

辛亥。

欽差都統哈琅阿奏竊孝仰承

恩命。敕赴山海關。董率防勦。體察口岸邊城兵力。嚴密暨嚴密布。置各情形。曾經奏

聞在案。前聞該逆利於水戰。不利於登陸。乃廈門之役。陸路亦能用兵。務須計出萬全。方保事無貽誤。伏查山海關石河口

岸東西相距三四十丈。不為不寬。潮長之時。水勢亦深七  
八尺至丈餘不等。該逆二號夷船。乘潮可進。由此西去。直  
接撫甯洋河海口。水道一百餘里。陸路二百餘里。中間口  
岸極多。節節俱可登路。茅等再四籌酌。前設海岸營盤。覺  
以之防海尚可。以之防陸似欠妥協。茅擬將前設海岸旗  
綠營盤。改移海神廟地北。去海三四里許。擇度地勢。飭令  
糧道高樹勳。雇覓夫役。由甯海邊牆起。斜向西北。直抵石  
河。約長數里。橫築土壘一道。外創濠溝。隨處暗掘梅花陷  
坑。內栽竹籬。蓋蓆掩土。均令我兵聆悉標記。並按一二里  
許。擇其扼要。安營數座。直達石河以西。不惟控制秦王島。

凡可登岸之處均可上下應援。並逐段添設馬撥。派兵瞭望。一有消息。星飛馳報。至舊有新添大小礮二十二尊。除將石河口礮臺三座。每臺揀設極重鐵礮一尊。派兵看守。

臨事相機施放。擬將八千斤五千斤銅礮並下餘礮位均

本報所見是年李鴻章以十萬鎊定製礮

擬撤安土壘之上。以備逆夷登陸施放攻擊。夷船一至。見

我兵寡礮單。勢必棄船登陸。擁奔關城。以圖占據。度其近切。伏兵四起。槍礮齊發。奮力兜勦。攻其不意。至山海關邊城。起自老龍頭。達連關。北大山。計程二十餘里。率多殘闕。可達入城。誠恐逆夷潛通內奸。拏按段撥兵伺察。以防不

虞。

諭軍機大臣等。哈喇阿春壽畫布兵安礮一摺。所請將各兵營盤改移之處。均著照所議辦理。惟此次逆夷滋擾陸路。亦甚兇悍。昨在定海與我兵對敵。殺去一層。又添一層。直是拚死上前。熬戰六晝夜之久。我兵槍礮紅透。接濟不來。遂致失事。據奏將礮位安置土壘之上。俟逆夷登陸。施放攻擊。所見甚是。山海關礮位不多。如果逆夷登岸。必預先吩咐兵弁。見有數百數十夷人。再行開放槍礮。不可因見一二夷人。遂將火藥空放。及至大隊前來。火藥反不效用。且礮位暗藏之地。尤應機密。不可令夷人窺探明白。致有準備。胡超不日即抵山海關。務當和衷商量。布置妥協。以操全勝。嗣後凡有奏報之事。俱著兩人會銜。將此諭

知哈喇阿並諭令胡超知之。

直隸總督訥爾經額奏竊照喫逆自上年七月駛赴北洋遊奕維時天津之大沽甯河之北塘以及豐潤至山海關一帶州縣額兵無多均自本省各營徵調防堵惟遠調多兵經年累月無事坐食需費浩繁若因其不來而暫撤因其欲來而又調則不特往返徒勞且恐勢有不及必當豫籌全局以逸待勞方為經久之計。臣日與天津鎮道悉心講求與其臨時徵調不若就近募增查大沽北塘等營汛共止額兵二百餘名。臣於上年奏准添募專守礮臺新兵五百名合計僅止七百餘兵。茲酌擬大沽添安兵二千名。

北塘添安兵一千名。南自山東交界之大口河海口起。北至北塘海口止。水陸交防。天津郡城酌擬添兵一千名。以為後路策應。其豐潤並永平府屬臨榆灤州樂亭昌黎撫甯等共六州縣添安兵二千名。以一千名撥駐臨榆縣之山海關。以一千名分布豐潤等五州縣本營汛。惟

國家兵額有定。未便頓議加增。如全在直隸各標營內抽裁。則所添兵數較多。未免有顧此失彼之虞。臣再四籌維。擬於直隸本省各營抽裁二千名。其餘四千名。應請

敕下兵部。查明外省簡僻營分行文抽裁。庶幾積少成多。各省兵不覺單。而挹彼注茲。於

畿輔重地。實有裨益。至各處兵既增添。均應分別添駐大小營員管理。應俟欽奉。

諭旨後。在於本省標營內改撥移駐。並應於沿海添建墩臺營房。以期聲勢聯絡。臣通盤籌計。其抽裁添安兵一千名。及移駐大小營員。於俸薪錢糧。均無增益。即添建墩臺營房。並官員衙署兵房一切工費。約計不過十萬兩上下。以現在防堵之費。裁減兩月。即已敷用。此後一勞永逸。既免徵調之煩。又可節無限經費。無論該夷何時驟至。以現在所備之墩。並現在擬添之兵。處處防守。無隙可乘。該夷當不致再萌北駛之念。臣為海疆經久備防起見。如蒙

俞允。趁此秋冬之間。早為招募。訓練兵技。約以半年為期。當可一律整齊。

硃批軍機大臣會同該部議奏。

九月壬子。福州將軍保昌。副都統額勒錦。福建巡撫劉鴻。翻奏。竊照。逆夷船於本年七月初九日。竄入廈門。滋擾。當經。臣等督飭文武。嚴密防守省垣。並飛調。延建邵各營。兵丁二千名。至省調遣。恭摺。由驛馳奏。八月十一日。承准。軍機大臣字寄。欽奉。

上諭。閩安協所轄五虎門。為省垣咽喉。尤當嚴密分兵防守。不可大意。該夷伎倆。原祇恃船堅礮利。習慣風濤。今該逆登陸。占據。

礮臺亦如此兇狠。是防之之術。必應水陸交嚴。方不致倉猝失事。顏伯燾退守同安。保昌等堅守省城。均屬責任重大。但恐兵力單弱。已降旨飭令吳文鎔。迅調精兵二千名。赴閩應援。該督撫總當激勵眾心。及早克復廈門。毋得坐失機會。漸形滋蔓等因。欽此。伏查逆夷自竄廈以後。於七月二十一日開去船三十餘隻。尚有五六隻。或七八隻。或十隻。盤踞廈港孤峙之鼓浪嶼。業經督臣顏伯燾將收回廈門口岸情形。具摺奏明。惟該夷在鼓浪嶼。晝則登岸練兵。夜則下船放礮。雖尚未出滋擾。而廈港一日不靖。海防不能一日不嚴。省垣為根本重地。誠如

聖諭必應水陸交嚴。方不致倉猝失事。離省城十里為南臺。海船聚泊之所。鋪戶稠密。如夷船到此。民心已自惶駭。離南臺三十里。地名少岐。該處港道窄淺。量寬四十餘丈。深六七丈。現飭署福州府知府史致蕃。督同委員購船二十隻。載石沈水。大船已不能通。兩旁再用石幫鑲。潮退石與水平。三板船亦不能入。仍恐潮來。小船從石上竄進。離少岐里許。名林浦。用木排橫攔。蓋以土泥。該處水勢寬緩。底皆沙泥。下碇可期穩固。守此則南臺之咽喉已塞。復飭臬司裕康。並留辦局務之升。任浙江鹽運使常大瀛。署督標中軍副將徐捷。撫標中軍參將保芝琳。前任督標中軍副將富

爾遜布。福防同知文燦等查勘。自林浦以下。至五虎門中  
間要隘。一為南北岸。一為金牌長門。皆兩山對峙。水深溜  
急。船石木排。皆不能用。倣照漁戶攔港掛網之法。用四方  
大木架。加以鐵爪。繫以篾纜。用竹篾盛石。沈於水底。架浮  
水面。隨潮上下。三板船能鈎破其底。即大船亦能挂其柁。  
又烏龍江。有內港可繞入西關外之洪山橋。水不甚深。亦  
皆用石填塞。以堵小三板竄入之路。省城旗綠營兵。除向  
例各處值班外。實存兵一千零四十名。又挑開散餘丁二  
百名。旗員帶之。專令守城。督撫標及城守各營兵七千七  
百餘名。除督臣調往泉州。尚存兵六千有奇。又奏調延建

邵兵二千名。又閩安水師營兵一千五百餘名。又官雇鄉勇水勇三千名。又紳士自雇鄉勇二千名。臣等酌撥兵勇與旗營弁兵守城。其餘由五虎門至省百六十里。擇其要隘。節節用伏。多設假礮臺。以耗其礮力。如我之水勇。不能取勝。彼必登岸。則陸路伏兵齊起。定制其命。五虎港內兩岸村莊。均各團練義民。可以前後連環。與兵協擊。又省港多礁石。商船必得漁船引行。現飭各該縣將漁船全收入內港。給以口糧。曉以大義。不得引夷滋事。並令水師船日夜盤詰奸細。此臣等布置省城之大畧也。臣等查逆夷雖有偽陸路提督名號。實不能陸戰。廈門之失守。大礮皆設

口岸雖能擊破其船。彼以多船多礮。攻我礮臺。礮臺毀。即乘間上岸。用我之礮打我之兵。我兵無礮與對。遂至死傷潰散。非能陸戰也。雖得陸地。總不敢遠離其船。彼不於廈門立營。大隊一去。即移船於鼓浪嶼。此其徵也。性又多疑。時慮攔淺。海澄與廈門一港可通。彼以船探水。見已塞港。即退。七月二十一日。夷船退出廈門時。聲言二十五日攻五虎門。至期竟駛入東北外洋而去。傳說是聞省港已截。此雖謠言。亦非無因。是截港為禦夷要務。現在督臣飭諭沿海文武。皆用截港之法。移礮設伏省港。乃臣等專辦。逆夷必不敢闖入。即闖入亦有以待之。可保無虞。足釋

聖廬所有蒙

恩調江西精兵二千名。一俟到省。立即飭赴泉州。聽督臣調遣。攻

勦。

劉鴻翱又奏。查閩省向不產鉛。茲因逆夷滋擾廈門。鉛子一項。為行軍要需。省庫所存不多。仰懇

天恩。俯准在於江西。安徽。湖南。湖北。四省。每省借撥槍鉛子四萬斤。礮鉛子二萬斤。彙同前次奏撥各省硝磺。一併解閩。以資接濟。

諭軍機大臣等。保昌等奏。防守省垣情形一摺。據奏收回廈門之後。尚有逆船數隻。盤踞廈港。孤峙之鼓浪嶼。省城各處要隘。現

已截港設伏。逆船不敢闖入等情。布置尚屬周妥。仍著加意嚴防。無稍疏懈。前調江西兵二千名。現經裕謙截赴浙江矣。另片奏需用鉛子二十四萬斤。已咨各省督撫趕緊籌撥。但現在逆夷占據定海。浙省軍務緊要。硝磺鉛丸亦在所急需。如該省足敷應用。著即分給浙省。交裕謙分貯。以備應用。該將軍等酌量籌辦。無存畛域之見。

癸丑。

欽差大臣兩江總督裕謙奏竊。於八月十九日。將定海失守緣由具奏後。當即專遣妥人。前赴定海。探明逆夷據守城池口岸。並將夷船二十八隻。散泊遊奕。意似阻我往來道路。

而揆其詭詐。必將來撲鎮海。尚有夷船十餘隻。除焚燬擊損外。餘俱不知去向。現在鎮海守禦極屬。僕敢前來侵犯。必當激勵兵民。制其死命。至該逆習見我沿海兵民。風氣柔脆。肆其猖獗。若不痛加勦洗。必致蔓延不已。查各營官兵。皆有守土之責。若紛紛徵調。不獨遠近不齊。心力不一。且曠日持久。適足增長逆焰。惟有江南之徐州鳳陽潁州三府。民人膂力技藝。素稱精熟。又能尚信義。重然諾。可以激而用之。竊不揣冒昧。已飭熟悉情形之安徽太平府知府舒夢齡。前赴鳳潁二府。雇覓其徐州鄉勇。聞河臣麟慶本已招有成數。竊即飛咨麟慶代為招募。統計以五千。

人為率。分起管帶前來。以備調遣。其前路截調之江西兵二千名。以一千名駐紮鎮海縣城。一千名駐防甯波府城。為後路策應。至定海鎮總兵葛雲飛。處州鎮總兵鄭國鴻。屍身業據定海義民搶護回鎮。率同文武各員。親詣看明屬實。惟徧體重傷。殊堪憫惻。已飭從厚棺斂。暫寄郡城。傳屬扶回。壽春鎮總兵王錫朋。聞於受傷垂斃之時。被逆擄去。有壽春兵十人。捨命追奪。該逆開礮轟擊。兵丁死者七人。尚有一人。現無下落。亦未查實名姓。並聞該逆因恨壽春兵殺賊最多。王錫朋督戰又力。將王錫朋細本報不詳加審割。屍身無著。洵屬可慘可恨。所有定海鎮總兵處州鎮總兵

關防二顆。先經葛雲飛鄭國鴻封交親隨弁兵懷藏逃出。現已解送來營。李已會商余步雲飭委提標右營水師遊擊周士法暫行護理定海鎮總兵印務。署提標中軍參將張從龍暫行護理處州鎮總兵印務。其壽春鎮總兵定海鎮總兵處州鎮總兵員缺相應請

旨迅賜簡放。並請

敕令兼程來浙。以備調遣。至定海難民業經甯波府知府鄧廷彩妥為安插。李前此奏明飭調之前任福建藩司鄭祖環已於八月二十日到營。

裕謙又奏。李專遣精細土人前赴定海探知帶兵來浙逆

首。即係上年被定海鄉民包祖才拏獲解送後經釋回之

安突德及偽知縣郭士立二人。並無噤嘴噎其人。又有定

海縣差役李彪人甚明幹。上年經甯波府知府鄧廷彩派

令往來定海探聽消息。後被該逆擄去。今仍帶回定海。李

已專人前往招撫。俟其來時。或用或誅。察看情形再行酌

辦。現在該逆派兵把守城門。搭檢進出之人。城內居民之

未及遷避者。按戶散給錢文。已經遷避者。即將房屋燒燬。

鋪面不准關閉。日用重價買物。要結人心。並在岑港沈家

門。三江等處。安設帳房。逆船則分繞各壘。停泊遊奕。阻我

大兵去路。又聞該逆因此次侵犯定海。我兵連日擊焚其

火輪船一隻。大兵船三隻。三板船多隻。又在陸路勦殺逆夷一千數百名。為年餘未有之惡戰。而壽春兵殺賊最多。處州兵次之。是以深恨壽春官兵。勒令各寨居民不許藏匿渡載。如有檢獲送去者。送給洋銀。並稱將令漢奸穿著號衣。詐為逃兵。襲取鎮海。其言雖皆無據。而此次轉戰六晝夜。開放大礮。擊焚逆船者。惟已故定海鎮總兵葛雲飛所練親兵五百名。最為得力。其在陸路殺賊。皆係壽春兵當先。處州兵隨進。現在投回壽春官兵。甚屬寥寥。處州官兵亦不甚多。其餘如浙江提標等營將備弁兵。雖未據報有投回實數。而風聞觀望探聽者不少。可為明證。至該逆

攻撲定海時。先向土城及竹山。晚峯嶺開放大礮。不下千餘。不能傷我一兵一卒。而逆船轉為我屢次擊焚。其船礮技藝已窮。遂用三板船。剝載閩廣漢奸。雜以黑夷。在竹山晚峯嶺登岸。即將三板船駛去。另載一起前來。如是數次。其船即去不返。以該逆不甚愛惜之漢奸黑夷。置之死地。本屬破釜沈舟之計。設浙江提標等營官兵。盡能如壽春處州兩路官兵。奮不顧身。前隊陣亡。後隊繼進。畢竟主客勢殊。祇須再相持一二時。不難制其死命。乃提標等營官兵。性本柔懦。技藝又不如壽春等標之純熟。一臨大敵。倉皇失措。事敗垂成。逆破復熾。將孝年餘以來心血。盡付

流水上無以對

君父下無以對兵民此孝之所以痛心負疚百身莫贖者也現在鎮海防兵惟徐州鎮標官兵一千名可以備戰收集之壽春處州等標官兵現尚不過三四百名且多受傷者其續調之壽春兵一千名計須九月底始到另請裁調來浙之江西兵二千名及江甯八旗官兵八百名祇可為防守之用不足言戰餘皆浙江兵丁深不足恃適有定海義民徐保兄弟四人竊負總兵葛雲飛鄭國鴻屍身來營孝詢知徐保兄弟有踰牆走壁之能又聞署定海縣知縣舒恭受於城破時服毒自盡為居民搶護出城灌救得生藏之山

舉該員又已絕粒數日。現在生死尚無確信。李已遣徐保飛赴定海。密訪舒恭受。如果未死。該員素得民心。能用民力。本係浙江好官。囑其善為調養。糾集義民。以待大兵。儘能設法刺其頭目。則逆兵瓦解。更可轉敗為功。但大兵之可用者。止有徐壽兩標兵二千餘名。難以集事。若調湖南四川官兵。非特緩不濟急。且桀驁難制。適足誤事。前在廣東。可為殷鑒。浙江之鄉勇水勇。亦不過羈縻匪類。不使內訌而已。若招集閩廣亡命。則與漢奸無所分辨。且性情浮動。重利輕義。非能真為我用者也。李再四思維。江南之徐州鳳陽潁州三府。毗連豫省。人性爽直。而有信義。不乏技

藝精熟。勇敢有為之人。李已分投招募。不惜重資。亦不論其有無犯案。祇須其膽壯技熟。挑選四五百人。分起管帶前來。為一鼓殲擒之計。

裕謙又奏。李正在拜摺間。該逆船四隻。駛進蛟門一帶遊奕。逼近鎮海。李現在豫備攻剿。以彰

天討而洩眾忿。

硃批。定奏捷音。速行馳報。

諭內閣。浙江定海鎮總兵提督銜葛雲飛。處州鎮總兵鄭國鴻。江南壽春鎮總兵王錫朋。當定海失守之時。同時陣亡。已降旨令該部照例賜卹。本日據裕謙奏。此次轉戰六晝夜。開放大礮擊

焚逆船。惟葛雲飛所練親兵。最為得力。陸路殺賊。壽春處州官  
兵。均極勇敢。勦殺逆夷一千數百名。因該逆驅使閩粵漢奸。搶  
死登岸。眾寡不敵。以致失事。現在葛雲飛鄭國鴻屍身。業已從  
厚殯斂。王錫朋屍身尚無著落。覽奏為之墮淚。該總兵等奮勇  
殺賊。效命疆場。深堪憫惻。除照例賜卹外。加恩各賞銀五百兩。  
由各原籍藩庫給發。並著該省督撫查明該故員等子孫幾人。  
據實具奏。葛雲飛鄭國鴻主錫朋。俟定海收復後。建立專祠。王  
錫朋仍於該原籍建立專祠。該故員等靈柩回籍時。並著各該  
地方官妥為照料。此次隨同葛雲飛鄭國鴻王錫朋陣亡將弁  
兵丁。除分別奏咨照例卹賞外。並著裕謀確切查明。分咨各原

籍督撫將其家屬從優撫卹。用示朕憫節昭忠有加無已至意。諭軍機大臣等。本日據裕謙馳奏查探定海夷情。籌備堵剿一摺。據奏夷船二十八隻。散泊遊奕。阻我道路。尚有船十餘隻。除焚燬擊損外。不知去向。該逆詭詐性成。去來無定。現有逆船四隻。駛進蚊門。該大臣已豫備攻剿。一有捷音。即行馳奏。所奏鳳陽。潁州二府鄉勇。已飭太平府知府舒夢齡。前往雇覓。徐州鄉勇。已經麟慶招有成數。飛咨分起管帶備遣。江西兵二千名。分駐策應之處。均著照所議妥為辦理。新放定海鎮總兵陳述祖。本係浙江副將。即著該大臣迅速飭赴軍營。無庸來京請訓。其新放之處州鎮總兵梁勝灝。壽春鎮總兵尤渤。已諭知托渾布。牛

鑑轉飭該鎮兼程赴浙矣。另片奏定海縣差役李彪先被逆夷擄去。現仍帶回定海。已專人前往招撫。著該大臣俟其來時。密詢該逆船隻多寡。礮位約有若干。現欲分竄何處。意欲何為。詳細究詰。至其人是否有可用之處。著該大臣察看情形。酌量辦理。現當軍興之際。固須多用間諜。惟該逆既有令漢奸詐為逃兵之語。亦須慎防奸細。至定海義民徐保兄弟四人。竊負葛雲飛鄭國鴻屍身來營。有踰牆走壁之能。即著裕謙量材委用。從前三省教匪滋事之時。儘有由義勇出力。擢至大員者。署定海縣舒恭受前已有旨賜卹。如果未死。即令善為調養。以備驅策。所請改撥解閩軍需業已降旨准行。其葛雲飛等陣亡情形亦

明降諭旨。加恩優賞矣。

又

諭山東文登協副將梁勝灝。昨經簡授浙江處州鎮總兵。河南荊子關協副將尤渤。昨經簡授安徽壽春鎮總兵。現當浙江軍務喫緊之際。著托渾布。牛鑑。卽飭知該總兵馳驛兼程。速赴浙江軍營。聽候裕謙差委。毋庸來京請訓。

甲寅

諭內閣。兵部奏請將王錫朋。鄭國鴻。照總兵例賜卹。葛雲飛。可否照提督例賜卹。具奏請旨。葛雲飛前經賞給提督銜。先換頂帶。著卽照提督例賜卹。王錫朋屢著戰功。被害尤慘。著加恩亦照

提督例賜卹。鄭國鴻照總兵例賜卹。該故員本兼雲騎尉世職。此次應給騎都尉世職。如何歸併分襲。著該部叵議具奏。至同知舒恭受議卹之處。著該部聽候諭旨遵行。

乙卯。杭州將軍奇明保。浙江巡撫劉嶺珂。杭州副都統恆興奏。竊臣等前因定海失守。乍浦省垣兵力單弱。於本月二十一日。會摺奏請飭調江西湖北兩省兵二千名來浙分防在案。嗣於二十七日亥刻。疊接鎮海等縣營稟報。二十四等日。夷船三十餘隻。由定海陸續駛入鎮海蛟門。在笠山虎蹲山一帶遊奕等情。臣等以笠山等處距鎮海縣城不過十餘里。該逆連舫內駛。顯係窺伺鎮海。正在奏

報聞二十八日酉刻。接據甯波府知府鄧廷彩六百里稟報。稱該府在郡辦理防工。二十六日午刻。警聞逆夷於是日攻犯鎮海。由招寶山口開礮闖入。

欽差大臣裕謙親督官兵堵禦。無如夷礮猛烈。不能抵當。隨即殉難。被百姓救護出城。送至郡城。昏迷不醒。鎮海業已失守。急應招集散兵。設法防勦等情。臣等接聞之下。憤懣難名。該逆於旬日之間。連陷二縣。鴟張已極。甯波府為浙省東南重鎮。全恃鎮定兩縣為之屏蔽。今兩縣先後失守。該府藩籬盡撤。而府城向為商賈馬頭。民殷物阜。該匪垂涎已久。既將鎮海攻陷。距府城水陸均止六十里。我兩處礮械。

悉為彼有。難保不乘勢內犯。臣劉韻珂責任封圻。分應親督重兵。馳往應援。惟省城逼近尖山要口。夷船可以直達城下。較甯波尤為緊要。而省標滿漢各營。兵力甚單。守衛尚屬不敷。勢不能多為調撥。且省中五方雜處。良莠不齊。又自定海被陷以來。該縣難民。及鎮海甯波等處民人。紛紛來省。復有安徽江南江北被水災黎。接踵前來。更恐有奸宄溷跡其中。現在省垣內外居民。一聞鎮海警信。盡皆驚懼。各思遷避。尤恐匪徒乘機滋事。此時臣劉韻珂若酌帶兵丁二三百名。馳往甯波。於該處未必即能有濟。而省垣根本重地。設有他虞。為患更大。臣等與司道等通盤籌

畫現在甯波情形究竟如何。難以懸揣。而自甯波內河以  
至紹興。再由紹興以至省城。除錢塘曹娥兩處大江外。其  
餘皆係支河汊港。該逆大船斷不能到。惟恐其杉板小船  
分頭竄入滋擾流毒地方。戕害黎庶。惟有在紹興上虞餘  
姚一帶。趕緊設兵防堵。阻其內竄之路。臣等不得已。現於  
撫標挑撥精兵二百名。並壯健鄉勇一百五十名。飭令臬  
司蔣文慶會同金華協副將朱貴。並文武員弁。馳往該數  
縣適中要隘之處。巡防堵禦。如遇逆夷及漢奸。駕坐小船  
闖入內地。即督飭兵勇。同本處鄉勇。痛加勦擊。俾令不敢  
深入。一面飭委另補知府王壽昌。帶同佐雜數員。齎帶銀

兩前往餘姚縣之後海一帶地方。雇募鄉勇。該處風氣剛  
勁。人皆強壯。足以禦侮。確探甯波消息。如遇逆夷前往侵  
犯。即就近轉飭該府。將所雇各勇。陸續遣赴甯波。以為戰  
守之助。其自鎮海散潰兵丁。如有至紹興上虞餘姚等處  
者。亦由該臬司就近截回甯波。以資遣用。至提臣余步雲  
甯紹台道鹿澤長。下落。並此外各鎮將或存或亡。甯波府  
並未稟及。惟該府現稟內。有稟請提督等招集散兵之語。  
是余步雲等均尚無恙。現亦飭令該司確查。並查鎮海實  
在失守情形。另行奏報。惟是該逆強悍兇悖。疊次攻陷城  
池。罪大惡極。實為天地所不容。神人所共憤。亟應大加撻

伐以彰

天討第浙省重兵。本聚鎮定兩處。今潰散之餘。不能深資倚賴。此外各兵。分守本境。尚形不足。萬難再撥。其裕謙前此奏調之徐州兵三百名。壽春兵一千名。江甯駐防旗兵八百名。又奉調赴閩。截令來浙之江西兵二千名。臣等請調之江西兵一千名。湖北兵一千名。內除徐州兵江甯旗兵已先後到浙。又臣等所謂之江西湖北官兵。到浙後。應分防省城乍浦外。裕謙所謂之壽春江西兵共三千名。現俱未經入境。且為數無多。逆夷兇燄甚熾。恐不足以資攻戰。裕謙現又昏迷。臣等復未爛韜略。況省垣乍浦。在在喫重。勢難

達翰惟有仰懇

皇上天恩。迅賜

簡派帶兵大臣。多發京營及各省勁兵。兼程來浙勦辦。以期克復。

再臣劉韻珂前因定海失守。已請

旨交部議處。今鎮海又復失守。應請

敕部併案。嚴加議處。以示懲儆。

殊批憤恨之至。即有旨諭

諭內閣。奕經著授為揚威將軍。哈琅阿胡超著授為參贊大臣。馳

驛前往浙江辦理軍務。

又

諭陳階平著仍以提督用。即馳驛迅赴浙江軍營。

諭軍機大臣等。本日據奇明保等奏。鎮海失守一摺。已授奕經為揚威將軍。哈琅阿胡超為參贊大臣。馳驛前往浙江辦理軍務矣。杭州省城緊要。劉韻珂著仍駐紮杭州。會同奇明保。恆興。督率滿漢兵勇。協力防堵。並於定海鎮海兩處。招集散亡。安撫居民。仍嚴防奸宄混跡。以杜內應。所奏保護紹興等處。已飭臬司蔣文慶帶兵前往。並委另補知府王壽昌帶銀雇募鄉勇等語。均著照所議辦理。據奏余步雲現尚無恙。著仍移駐甯波府。督同鹿澤長鄧廷彩。招集兩處兵勇。協力固守。俟剋日大兵抵浙。會同攻勦。所有前調江西湖北安徽各兵。已由六百里加緊諭。

知裕泰吳文鎔程楸采飭令帶兵各員迅即赴浙並令胡超帶領陝西官兵先行抵浙矣其鎮海失守情形著即查明迅速奏聞

又

諭本日據奇明保等馳奏鎮海失守已有旨授哈琅阿為參贊大臣赴浙辦理軍務矣哈琅阿著即馳驛來京陛見所有山海關現調各官兵及防堵事宜即著文倭克精額富勒敦泰管理

又

諭本日據奇明保等馳奏鎮海失守已有旨授胡超為參贊大臣矣胡超著即帶領陝西頭起官兵迅速啟程徑赴浙江軍營辦

理防勦事宜。毋庸來京請訓。所有該省後起官兵。已降旨令訥爾經額楊國楨富呢揚阿飭催速行。該大臣途次遇見續到官兵。並著管帶前往。以資調遣。

又

諭本日據奇明保等馳奏。鎮海失守。所有前調陝西兵二千名。已飭令胡超將所帶頭起。改赴浙江軍營。其二三起。無論行抵何處。著富呢揚阿飭令管帶之員。帶同迅速赴浙江軍營。沿途著訥爾經額楊國楨。迅即催往浙江。毋稍遲延。

又

諭前因逆夷在浙滋事。有旨令裕泰挑選湖北黃州協等處精兵

一千名。吳文鎔挑選江西九江鎮精兵一千名。迅速赴浙。又經裕謙奏准。將調赴閩省之江西兵二千名。截赴浙江。並飛咨程霖采。調用安徽壽春鎮兵一千名。本日據奇明保等奏。逆夷猖獗異常。鎮海復又失守。所有前調湖北江西安徽各兵。著裕泰、吳文鎔、程霖采、飛飭帶兵鎮將。迅速馳赴浙江。以資堵剿。毋得稍有遲誤。

又

諭前任福建水師提督陳階平。本日已明降諭旨。將陳階平仍以提督用。飭令馳驛。迅赴浙江軍營矣。朕聞陳階平現在清江一帶。麟慶接奉此旨。即將本日諭旨給看。飭令迅赴浙江。毋稍遲

廷。

丙辰。

諭內閣。前經降旨。將顏伯燾寬免治罪。仍交部嚴加議處。茲據該部議請革職。已屬從寬。姑念廈門業已收復。著加恩降為三品頂帶。革職留任。以觀後效。

又

諭怡良。著作為欽差大臣。馳驛前往福建。會同顏伯燾劉鴻翱辦理軍務。

又

諭富僧德。著賞給副都統銜。馳驛前往山海關。會同倭克精額富

勒敦泰辦理防堵事務。

又

諭容照著賞給三等侍衛。馳驛前往浙江軍營。交奕經差遣委用。

又

諭奕紀著加恩釋回。發往廣東軍營效力贖罪。毋庸來京。

又

諭琦善著加恩釋放。發往浙江軍營效力贖罪。

諭軍機大臣等。竊諭浙江巡撫劉韻珂。昨因鎮海失守。已由六百里加緊諭令該撫妥籌辦理矣。因思大兵指日到浙。必慮設立糧臺。廣為儲備。方足以聯眾志而壯軍心。著該撫妥為籌畫。應

設立何處。最為妥協。該撫總理局務。其派管之員。即著遴選藩臬監司。專司稽覈。儻浙省大員不敷差遣。即著奏明請旨。此事關繫重大。務使源源接濟。毋誤軍需。儻臨時遲誤。惟該撫是問。

又

諭逆夷猖獗。鎮海失守。現已命將出師征剿。著鄂順安迅速挑選河南精兵一千名。派委曾經出師之將弁管帶。前赴浙江軍營。聽候調遣。沿途嚴加約束。毋許滋擾。

又

諭昨已降旨。將所調陝西兵二千名。改赴浙江軍營。並諭訥爾經額於該省官兵過境時。催令迅速前進矣。現在山海關兵力較

單。所有前次所撥直隸兵一千名。著無庸裁撤。如已起程。即著飭令迅速折回。以資防堵。

又

諭顏伯燾以封疆大吏。責在守土。前因防堵不力。廈門失守。本應治罪。姑念旋將廈門收復。已明降諭旨。將該督加恩降為三品頂帶革職留任矣。閩省為海疆要區。廈門尤為全省關鍵。誠恐逆夷復來滋擾。現在該督等招募水勇。團練鄉民。已有成效。仍著加意訓練。激勵眾心。同禦外侮。本日已派廣東巡撫怡良。作為欽差大臣。會同顏伯燾。劉鴻翱。辦理軍務。顏伯燾身罹重譴。經朕格外施恩。棄瑕錄用。應如何激發天良。力圖報效。儻夷船

駛至。必當設法攻勦。轉敗為功。庶可稍贖前愆。如仍前畏葸無能。貽誤大事。必將該督加等治罪。決不寬貸。懍之慎之。

丁巳

諭內閣。文蔚著馳驛前往浙江。隨同揚威將軍奕經。辦理軍務。

又

諭前任藩司鄭祖璠。卞士雲。候補知府孫善寶。均著即赴浙江省城。隨同劉韻珂。辦理糧臺事務。

浙江巡撫劉韻珂奏。竊臣昨據甯波府知府鄧廷彩稟報。鎮海縣城失守。

欽差大臣裕謙於殉難後。經百姓救護至郡。昏迷不醒等情。當經

飭委臬司蔣文慶金華協副將朱貴帶領省標官兵及鄉勇馳赴紹興一帶防堵。並委另補知府王壽昌至餘姚縣之後海等處雇募鄉勇赴甯波協同守禦。當將辦理緣由於本日丑刻會同將軍臣奇明保等由六百里加緊馳奏在案。卯刻復據甯波府知府鄧廷彩稟稱。

欽差大臣裕謙於到甯波後旋即甦醒。經隨員家丁護送回省。所帶之壽春等營官兵亦隨同起程。隨經提臣余步雲招集鎮海散回各兵在郡防守。並據署餘姚縣知縣彭崧年稟稱。二十七日未刻。有江甯副將豐伸泰等伴送裕謙。並關防二顆。過境。詢知裕謙因招寶山失守。投入泮池。當時撈

救尚存微息。恐致不起。是以兼程送回各等情。並准提臣  
余步雲鈔送具奏鎮海失守情形摺稿。聲明裕謙於退回  
甯郡後。隨即起程前去等語。臣當查甯波為浙東重地。必  
須該大臣在彼防守。當即飛咨該大臣。囑令迅速折回。一  
面咨會余步雲。趕緊招集散兵。設法嚴守。並因裕謙所調  
江甯旗兵八百名。陸續到浙。誠恐其一聞裕謙回省之信。  
已經過省者相率退回。未經過省者不復前進。以致甯波  
無接應之兵。當會同將軍。臣發牌傳知紹興府各屬。及甯  
波之鄞慈兩縣。轉飭帶兵官。即率領過省各兵。馳赴甯波。  
聽候余步雲調遣。其甯經到省之兵。即由將軍。臣派委協

領一員押送赴甯亦交余步雲遣用不准或有退縮茲又接據江甯副將豐伸奏稟稱伊隨同裕謙在鎮海城內督戰因招寶山被逆夷占據勢難守禦裕謙令伊與都司朱隆阿護印出城並將寓所文卷用火焚燒口稱世受

國恩當以身殉隨即跳入泮池身死伊恐遺屍遭逆夷殘毀督兵搶護出城由甯波至杭省盛敘等情臣查甯波府兩次稟報據稱裕謙先自鎮海退至甯波僅止昏迷後即甦轉由甯起程回省且二十七日該副將等路過餘姚之際經該署縣詢知裕謙尚有微息今該副將忽稱裕謙已跳入泮池身死經伊將屍搶護出城由甯來省棺斂與甯波

府等所稟種種不符。殊堪詫異。究竟該大臣是存是亡。容臣確切查探。另行奏報。惟該大臣既無實在下落。則三軍無主。難保不紛紛潰散。浙省此時無可另調之兵。亟應將散兵分頭截回。俾余步雲得憑兵力。守護郡城。現飭臬司蔣文慶副將朱貴各齎令箭。速至紹興一帶迎截。並通飭各屬。凡遇兵丁過境。一體截住。遣赴甯波。俱交余步雲驅策。以救目前之急。惟浙江疊次挫衄。兩縣城池。先後被陷。裕謀又無下落。人心驚惶無比。不但甯波一府。十分危急。各處亦復震動。即如省中。今日情形。倍甚於昨日。臣與藩司道府等。示以鎮靜。妥為撫輯。終恐不能家喻戶曉。惟有

仰懇

鴻慈俯如前摺所請

簡派大臣迅速統兵來浙俾安內攘外兩有裨益臣不勝急切待命之至

硃批初四日已有六百里加緊諭旨初九日諒可接到但裕謙究竟作何下落殊不可解

諭軍機大臣等據劉韻珂馳奏截留散兵遣赴甯波聽候余步雲調遣以資防守並查裕謙下落等語浙江鎮海失守已由六百里加緊諭知該撫等防堵事宜本日又降旨令前任藩司鄭祖琛卞士雲候補知府孫善寶即赴浙江省城隨同劉韻珂辦理

糧臺事務矣。逆夷既占鎮海，必窺甯波府城。該撫已派員至紹興一帶，將邊境兵丁截赴甯波，以救目前之急。著仍遵前旨，會同督率兵勇，協力防守。俟大兵雲集，剋期進剿。至礮位為軍中利器，鎮海礮位已為逆夷奪據，必得趕緊另鑄。著該撫即委幹員採辦銅鐵，鼓鑄一二千斤上下大礮數十位，以備要需。至裕謙投入泮池，副將豐伸泰等所稟，是否屬實，現在究竟作何下落，仍著查明具奏。

浙江提督余步雲奏，竊於本月二十六日，因鎮海失守，退保甯波。迅將大概情形，由六百里奏。

聞在案。當即督率將備兵丁，分派甯郡六門，更加嚴守，無如城垣

廣大周市二十里。從前在城額兵不足四千。除分防各汛。調派軍營外。僅止七百餘名。定鎮兩處。敗散之兵。雖經收回。不過十之一二。且驚心未定。勢難再令守陣。自裕謀於二十六日。由鎮海退入甯波。是日戌時。即率江南將備豐伸泰等兵丁數百名。星夜退走。餘姚紹興所有衛處二鎮官兵。藉以護送為名。概不入郡守城。以致全郡驚惶。逃避擁擠。自相踐踏。哭聲遍野。而無賴匪徒。又乘機劫奪。李督同甯波府知府鄧廷彩。並在城文武。分投查拏。隨時嚴辦。郡城稍為安定。不料火輪夷船。直駛至甯郡東北城外。量水深淺。城中礙位。去年六月分運定鎮兩處。現在無可施。

放人心尤為洶洶。兼之茅蒙授浙江提督以來。俱在軍營。郡城紳民多未見面。全賴甯波府知府鄧廷彰深得民心。勸令登陴防守。亦有應命前往者。惟夷船礮火兇狂。恐不足恃。浙江全省處處喫緊。現在無兵可調。茅惟有竭盡心力。督率文武多方設守。一面招集散兵鄉勇。共為聲援。一面飛催前調各省官兵。速為救應。

諭軍機大臣等。本日余步雲由六百里奏甯波郡城空虛。設法捍禦一摺。昨因鎮海失守。該提督退保甯波郡城。僅能捍衛無虞。尚可為浙省障蔽。茲據該提督奏稱礮位無存。兵丁無可調撥。空虛景象。遙想可知。現在逆夷已在城外量水深淺。必乘虛攻

擊該地方鄉民等力保孤城。正在危急。著劉韻珂設法救援。惟省城尤為緊要。又恐該夷聲東擊西。使我不能相顧。是在該撫通盤籌畫。擇要防守。如甯波已被逆夷滋擾。占據。即著該撫傳旨飭令余步雲同在省城協力防堵。其紹興郡縣與甯波毗連。儘有可救援之處。亦著極力設法。分別扼守。總之勢能兼顧。務當勉力為之。以副朕望。將此由六百里加緊諭知劉韻珂。並著諭令余步雲知之。

江蘇巡撫梁章鉅奏。竊臣於八月二十二日。准督臣裕謙由浙江鎮海咨稱。八月初七日。奉

上諭。本日據裕謙馳奏浙洋夷船日增一摺。江蘇洋面有無夷船。

蹤跡著即飛咨梁章鉅查探明確。據寶具奏等因。欽此。臣查大江南北海口紛歧。惟吳淞最為扼要。浙洋現有夷船遊奕。則江蘇沿海各口防堵更不可稍疏。歷經各前任督撫。諄飭沿海各營縣。及調防將備等。遵照晝夜瞭探。隨時稟報。自臣到任後。節據寶山崇明海門昭文等廳縣。先後稟報該處海口。並無夷船蹤跡。各港口岸。現均嚴密籌防。惟夷情詭秘不測。而洋面瞬息可通。實不敢幸其未來。稍為鬆勁。昨據督臣裕謙暨浙江撫臣劉韻珂。先後飛咨浙省定海縣於十七日失陷。三總兵同時陣亡等語。夷情如此猖獗。各海口尤不可一刻疏防。查現在兵勇槍礮。悉在吳淞。

夾岸提臣陳化成督率將弁等亦均駐紮岸邊而寶山縣城一路則不過照常防汛未免空虛風聞此次逆夷攻打定海實由陸路晚峯嶺繞越前進而該夷所垂涎者尤在上海馬頭則寶山上海兩處縣城斷不可稍有疏虞誠如

前奉

諭旨陸路亦不可不加嚴備臣現與提臣陳化成徐州鎮臣王志元及蘇松太道王玥等連日熟商必須增添兵力方可有備無患除會同提臣陳化成飛調提標漕標河標暨揚州奇兵等營兵各三百名常州營兵二百名浦口溧陽二營兵各一百名泰州營兵六十名泰興營兵四十名合共二

千名。星夜趕來上海。以便於上海寶山兩縣陸路要隘處所分別安插。以壯聲勢而安民心。一俟洋面稍就肅清。即行陸續撤防歸伍。再金山縣地方。與浙江乍浦海口相連。現在情形喫重。臣擬於現在添補各營兵內。抽撥三百名。赴該處分駐防禦。

諭軍機大臣等。梁章鉅奏。遵查夷船蹤跡。並添兵防堵陸路一摺。據奏江蘇洋面。現在並無夷船。惟寶山上海兩處縣城。不可稍有疏虞。已添兵防堵等語。江蘇上海馬頭。為逆夷所垂涎。必須增添兵力。方可有備無患。現在該撫飛調各標營兵。共二千名。於上海寶山兩縣陸路要隘處。所分別安插。辦理均屬周妥。至

金山縣地方與浙江乍浦海口相連。情形喫重。著准其於添調各營兵內抽撥三百名赴該處分駐防堵。該撫仍當隨時偵探。屢密豫防。勿因夷船現無蹤跡稍存疏懈。

又

諭現在逆夷滋擾浙江。已降旨飭令劉韻珂屢防痛勦。並多鑄砲位備用矣。因思江蘇為沿海之區。處處皆關緊要。江西界連閩浙。亦應加意豫籌。著梁章鉅吳文鎔。迅即派員雇覓工匠。將砲位多多鑄造。或銅或鐵。分量各重數百斤。至二三千斤不等。以備調撥。該撫等務當督飭認真趕辦。選料加工。演試總期有準適用。揚威將軍軍營如有調撥。斷不准片刻遲誤。懍之。

閩浙總督顏伯燾奏竊臣於八月十二日承准軍機大臣  
字寄七月二十八日奉

上諭本日顏伯燾奏夷船闖入廈門情形該夷如此猖獗實堪痛  
恨。趙此未及安定之時設法克復本省兵勇諒已陸續調撥協  
力防勦其應如何雇募水勇團練鄉勇之處務即迅速辦理防  
之之術必應水陸交嚴恐兵力單弱已降旨令吳文鎔迅調精  
兵二千名赴閩應援總當激勵眾心毋失機會漸形滋蔓該督  
自請治罪並各員分別交議之處著俟再降諭旨等因欽此臣  
跪讀之下悚惶愧恨感激涕零查自逆夷滋擾廈門經臣  
將辦理情形據實續陳並將開去夷船三十餘隻及收回

口岸地方緣由先後由驛馳奏在案。臣獲咎匪輕。辦理一切惟恐不速。何敢稍有遲誤。所有檄調陸路提標兵八百名。收回水陸原兵五千餘名。均經陸續分派各處。復經商令水陸提臣竇振彪。普陀保俱各招募新兵。已得一千餘名。同安紳士所募新兵。除飭興泉永道劉耀椿考驗技藝。分別裁汰外。尚存二千餘名。又飭晉江縣雇募鄉勇。除裁汰外。尚存四千餘名。同安縣雇募鄉勇。除裁汰外。尚存三千名。廈防同知等團練水勇一萬餘名。並飭該道劉耀椿督飭所屬於沿海各鄉村。分別人數眾寡。勸令團練。自百餘名至千餘名不等。或派分段。現給口糧。或造存名冊。

聽候調遣。或收養頭目。隨時招集。先事既杜。浮銷臨事無虞。缺乏俱已定有章程。惟此時雇練鄉勇為多。誠以水勇可集於一時。陸戰須先為設備。伏讀

訓示水陸交展一語。始知管窺蠡測。早在

聖慮範圍之中。曷勝欽服。臣各處分遣探聽。及登高瞭望。現在廈港夷匪。倏來倏去。總在十隻以內。而大小擔及東椗外洋一帶。或南或北。帆影不絕。又連接浙江石浦等廳縣稟報。自七月十三日以後。夷船逐漸增多。有停泊。至十九隻者。而象山之銅瓦門。又經該逆轟壞土堡。登岸釘毀大礮。燒毀巡船。定海亦有礮斃民人。焚燒民房之事。查廈門夷船

係七月二十一日。開去三十餘隻。而浙省於二十一日前。後。即有夷船停泊。滋擾。是在浙在閩。計已不止五六十隻。

此時廈港留泊之船。及此兵勇初集。銳氣方新。始用全

力殲之。無難一鼓成擒。但瞬已北風司令。夷不耐寒。大幫

駛回。即在目前。或全數入港報復。或分紮各處。攻打掣動

全局。相尋無已。在在可慮。通省海口較多。祇可先儘福州

泉漳等府各口。擇要設防。一俟兵勇齊備。所調江西援兵

到閩。臣即相機而動。將在港夷船。為一場而空之舉。即使

該逆務求報復。北風方屬。其至閩亦在來春。有此數月工

夫。廈門亟加繕治。綢繆防禦。庶可有濟。總之逆夷必須集

數撲滅而閩省大勢尤宜圖維所緩不過兩三月之間而  
辦理較有把握。臣與寶振彪善陀保及在事文武再四熟  
商意見相同不敢不據實陳明仰求

訓示。

顏伯燾又奏。臣正在繕摺間。先後承准軍機大臣字寄八  
月初三日奉

上諭顏伯燾現守同安。即當一面整備火礮器械。一面招募民兵。  
戮力同心奮勇勦擊。以期克復廈門等因。欽此。又八月初六日  
奉

上諭該逆前在廣東奕山等倉猝許給商欠銀兩。竟至飽其所欲。

以致滋擾無厭。此次該逆又復占據廈門。難保不復萌故智。顏伯燾業知廣東辦理不善。儻該逆再有要求。或因急圖繳還廈門。又墮詭計。罪在不赦等因。欽此。臣跪誦再三。感愧無地。查廈門開去夷船三十餘隻之後。在港不去者五隻。其候來候往。朝夕靡定者。大小不過三四隻。盡力勦擊。雖不敢謂操必勝之券。而乘間設法。容易得手。前因布置甫有頭緒。臣於七月十九日。飭令興泉永道劉耀椿。督同文武。率帶兵勇。潛赴廈門。該道即於二十日黃夜渡海。原擬二十一日連合鄉兵。乘夜掩襲。乃因該逆於二十一日黎明。大幫開去。未及痛創。而夷情叵測。若徒事撩撥。轉致四出肆擾。不

得不顧及全局。是以暫緩進兵。現在浙江已紛紛告警。可見該逆之異常詭譎。本年七月福建卒未隨其術中。以臣一身之計。正可及夷船無多之時。力圖攻勦。稍益前愆。然一擊之後。必非了局。萬一各處牽制。有礙通省。臣罪滋甚。惟有督率文武戮力同心。一有可乘之機。即當奮勇收復。固不敢輕率從事。亦不敢畏難苟安。至該逆夷因在廣東勒索洋錢六百萬圓之後。復欲勒索一千二百萬兩之銀。貪狡無厭。早在臣等意計之中。其逆目義律。是否回巢。亦未可知。現在逆夷筆墨全倣中國。自琦善伊里布與之文檄往來。彼此俱用照會。已褻中國之體。即此一事。臣已不甘為之。況

與之講款議和。臣萬萬不敢蹈此辱。

國之罪

諭軍機大臣等。昨已明降諭旨。將顏伯燾降為三品頂帶革職留任。並由五百里諭令該督會同怡良妥籌勦辦矣。本日據該督奏籌辦堵禦一摺。又另片一件。巧言宛轉。無非飾其不敢舉動之非。現在該夷船大幫去後。所留無幾。正當乘機整旅痛加攻勦。況據奏稱水勇鄉勇及調集各處兵丁。共計已有三萬餘名。較之夷匪已多數倍。不乘此時激勵眾心殲除醜類。尚復何待。著即督率將弁鄉勇等迅速設法攻擊。痛加勦滅。使逆夷首尾不能相顧。自必知懼。知儆。稍形斂跡。僅仍遲延縮。藉詞支吾。

必將該督加等治罪。決不寬貸。懍之。

靖逆將軍奕山。參贊大臣齊慎。兩廣總督祁項。廣東巡撫怡良。奏竊。等。於八月十六日。承准軍機大臣字寄。道光二十一年八月初四日。奉

上諭。前據顏伯燾等奏。夷船駛入閩洋。廈門失守。已降旨令該督等設法克復矣。前因逆夷占據香港。有旨令將軍等相機收復。現在該逆滋擾福建。粵洋夷船。自必減少。若乘其勢分力弱之時。督率兵勇。痛加勦洗。使彼首尾不能相顧。但須謀定後動。計出萬全。固不可坐失事機。尤不可再有挫失。著即體察情形。乘機進剿。如能設法攻復香港。則從前辦理不善。尚可少贖罪戾。

若狃於前議。觀望遷延。又墮逆夷更換詭計。則覆轍具在。不能輕恕也。慄之勉之。欽此。芽跪讀之下。惶悚難名。查逆夷更換兵頭。駛船北上。膽敢赴閩滋擾。攻陷廈門。旋又聞竄入浙境。怙惡不悛。神人共憤。而又恐狼貪不遂。失其巢穴。留兵船十餘隻。在廣東香港等處洋面。聚集漢奸數千人。飄忽出入。攔阻善後。其意以省河可以固守。則挾制無具。而虎門內外礮臺。早經刻為平地。彼此均無險要。可扼水師。無船無礮。祇有嚴守陸路。以防焚掠而已。是廣東根本之計。莫先於省城內河。擇要堵塞。而堵塞又不敢絕流。過水必須留水三五尺。以為宣洩。逆夷大船可斷。而三四號兵船及兩桅

三板雖不能悉數阻隔亦不能再任猖獗填塞之處在在須防而內河礮臺除舊者改造外尚須添築土墩土壘以為應援目下省河西南一路業已將次畢工而東路二沙尾甫經下樁勒限趕辦統計八九月內可以全數報竣礮位除加工添廠鼓鑄外統佛山省城計之可數內河礮臺隘口之用而鄉村團練土墩土壘之外凡有登岸要路皆須分礮安置以資固守是目前要務尚多未備不能不慎之又慎使之無從闖入省河然後出全力以伸捷伐此不能一時兼顧之實在情形也蓋虎門以內守急而戰緩虎門以外則戰守俱難得力以現在香港而論克復尚不甚

難而夷船得信。麇集勢必愈肆。狂悖無論內戶不固。功敗垂成。更恐擾及旁縣。愈增隱慮。旋得旋失。不惟不能分閩省之勢。轉慮速粵省之憂。現在各鄉聯絡。已有條規。而紳士等感戴。

天恩。莫不踴躍共議。抽丁輸餉。民心頗為奮發。較之從前。銳氣倍

增。粵等另募水陸壯勇。協同官兵。演練攻守之具。觀釁而

此九條來粵之賊。非本省。粵等之海軍也。

動。近又招回漢奸數百名。使之伺間策應。前此香港寮蓬

之燒。即係漢奸放火。因夷人知而防之。是以其黨漸貳。尖

沙嘴夷船被盜。亦不敢停泊。藉其同類之相猜。庶幾詐貪

之並使。若此輩果能始終為用。則多方以擾之。使逆夷不

得安居香港不特虎門內外礮臺船隻可以修造即使逆  
夷兵船全數返粵而分其黨與其動靜亦不致倉卒被  
其承突等受

恩深重仰荷格外

鴻施不加譴責少有人心何敢迴護前非自為地步但當權其輕  
重緩急如非計出萬全自不敢輕於一試若有可乘之勢  
亦斷不敢坐失機宜惟有恪遵

聖訓刻刻相度機宜以固海疆以圖進剿仰慰  
宸廑

殊批如有可乘之機即行進取斷不准遲延觀望

諭軍機大臣等奕山等奏相機克復香港一摺據稱現在粵省內  
外不能兼顧自係實在情形惟水陸義勇既有三萬餘人加以  
所留各處精兵數千名兵力不為單薄一有可乘之隙自當相  
機攻勦動出萬全所云招回漢奸數百名固可為耳目之用此  
最要之機間不容髮務宜獎勵激勸妥速為之以收實效至破  
位為行軍要需趁此暇時督率工匠趕緊興鑄無論大小銅鐵  
總期質地精純試放適用有準是為至要

奕山等又奏竊斃奕山等前於途次欽奉

上諭前飭琦善查明陣亡將弁兵丁數目已降旨交部照例賜卹  
並將陳連陞父子加等議卹惟將弁傷亡甚多該兵丁陣亡恐

不止此數。著奕山等查明琦善所奏。有無隱飾。據實具奏等因。欽此。當經移咨臣祁墳。臣怡良。飭司確查。從前傷亡將弁兵丁。究有若干員名。是否與前署督臣琦善原奏相符。隨據廣東布政使梁寶常詳覆。查明分晰。造具陣亡傷亡受傷各弁兵銜姓花名清冊前來。李等詳加覈對。各營傷亡將弁員名。多與原奏單開相符。惟水陸各營兵丁。陣亡傷亡及受傷名數。與原奏頗有參差。水師兵丁名數。較原數少開六名。陸路兵丁名數。較原數少開四名。復飭司確查覆覈。茲據查覆具詳。李等覆行詳覈。所有陣亡傷亡受傷兵丁現冊。與原奏名數參差之處。係因先經受有輕重。

各傷續於琦善具奏後。因傷亡故。至水師營內。尚少開造  
兵丁六名。先因查無下落。稱係陣亡。漂沒。嗣經陸續回營。  
以其並未受傷。無憑造入冊內。覈對數目。適相符合。另造  
姓名清冊。由臣祁埏送部查覈辦理。

殊批兵部照例辦理。